

通鑑紀事本末

DS
747
12
S7553Y8
1873
V. 54

EAST ASIAN LIBRARY
UNIVERSITY OF TORONTO LIBRARY
130 St. George Street
8th FLOOR
TORONTO, CANADA M5S 1A5

University of Toronto
Library

c 403/62

ASIAN COLLECTION

Vertical text on the left margin, likely a page number or chapter indicator, written in a traditional Chinese style.

通鑑紀事本末卷一百七十四

宋建安袁樞編輯

明太倉張溥論正

唐平遼東

唐高祖武德四年秋七月乙丑高句麗王建武遣使入貢建武元之弟也

五年上以隋末戰士多沒於高麗是歲賜高麗王建武書使悉遣還亦使州縣索高麗人在中土者遣歸其國建武奉詔遣還中國民前後以萬數

七年春二月丁未高麗王建武遣使來請班歷遣使

冊建武爲遼東郡王高麗王以百濟王夫餘璋爲帶方郡王新羅王金眞平爲樂浪郡王

九年新羅百濟高麗三國有宿仇迭相攻擊上遣國子助教朱子奢往諭指三國皆上表謝罪

太宗貞觀五年新羅王眞平卒無嗣國人立其女善德爲王

十五年秋七月上遣職方郎中陳大德使高麗八月己亥自高麗還大德初入其境欲知山川風俗所至城邑以綾綺遺其守者曰吾雅好山水此有勝處吾欲觀之守者喜導之遊歷無所不至往往見中國人

自云家在某郡隋末從軍沒於高麗高麗妻以遊女
與高麗錯居殆將半矣因問親戚存沒大德給之曰
皆無恙咸涕泣相告數日後隋人望之而哭者徧於
郊野大德言於上曰其國聞高昌亡大懼館候之勤
加於常數上曰高麗本四郡地耳吾發卒數萬攻遼
東彼必傾國救之別遣舟師出東萊自海道趨平壤
水陸合勢取之不難但山東州縣彫瘵未復吾不欲
勞之耳

十六年冬十一月丁巳營州都督張儉奏高麗東部
大人泉蓋蘇文弑其王武蓋蘇文凶暴多不法其王

及大臣議誅之蓋蘇文密知之悉集部兵若校閱者并盛陳酒饌於城南召諸大臣共臨視勒兵盡殺之死者百餘人因馳入宮手弑其王斷爲數段棄溝中立王弟子藏爲王自爲莫離支其官如中國吏部兼兵部尙書也於是號令遠近專制國事蓋蘇文狀貌雄偉意氣豪逸身佩五刀左右莫敢仰視每上下馬嘗令貴人武將伏地而履之出行必整隊伍前導者長呼則人皆奔逃不避阡谷路絕行者國人甚苦之亳州刺史裴思莊奏請伐高麗上曰高麗王武職貢不絕爲賊臣所弑朕哀之甚深固不忘也但因喪

乘亂而取之雖得之不貴且山東彫弊吾未忍言用兵也

十七年夏六月丁亥太常丞鄧素使高麗還請於懷遠鎮增戍兵以逼高麗上曰遠人不服則脩文德以來之未聞一二百戍兵能威絕域者也上曰蓋蘇文弑其君而專國政誠不可忍以今日兵力取之不難但不欲勞百姓吾欲且使契丹靺鞨擾之何如長孫無忌曰蓋蘇文自知罪大畏大國之討必嚴設守備陛下姑爲之隱忍彼得以自安必更驕惰愈肆其惡然後討之未晚也上曰善戊辰詔以高麗王藏爲上

柱國遼東郡王高麗王遣使持節冊命 秋九月庚辰新羅遣使言百濟攻取其國四十餘城復與高麗連兵謀絕新羅入朝之路乞兵救援上命司農丞相里玄獎齎璽書賜高麗曰新羅委質國家朝貢不乏爾與百濟各宜戢兵若更攻之明年發兵擊爾國矣十八年春正月相里玄獎至平壤莫離支已將兵擊新羅破其兩城高麗王使召之乃還玄獎諭使勿攻新羅莫離支曰昔隋人入寇新羅乘豐侵我地五百里自非歸我侵地恐兵未能已玄獎曰既往之事焉可追論至於遼東諸城本皆中國郡縣中國尚且不

言高麗豈得必求故地莫離支竟不從二月乙巳朔
立獎還具言其狀上曰蓋蘇文弑其君賊其大臣殘
虐其民今又違我詔命侵暴鄰國不可以不討諫議
大夫褚遂良曰陛下指麾則中原清宴顧盼則四夷
讐服威望大矣今乃渡海遠征小夷若指期克捷猶
可也萬一蹉跌傷威損望更興忿兵則安危難測矣
李世勣曰間者薛延陁入寇陛下欲發兵窮討魏徵
諫而止使至今爲患曩用陛下之策北鄙安矣上曰
然此誠徵之失朕尋悔之而不欲言恐塞良謀故也
上欲自征高麗褚遂良上疏以爲天下譬猶一身兩

京心腹也州縣四支也四夷身外之物也高麗罪大誠當致討但命二三猛將將四五萬眾仗陛下威靈取之如反掌耳今太子新立年尙幼穉自餘藩屏陛下所知一旦棄金湯之全踰遼海之險以天下之君輕行遠舉皆愚臣之所甚憂也上不聽時羣臣多諫征高麗者上曰八堯九舜不能冬種野夫童子春種而生得時故也夫天有其時人有其功蓋蘇文陵上虐下民延頸待救此正高麗可亡之時也議者紛紜但不見此耳上將征高麗秋七月辛卯敕將作大匠閻立德等詣洪饒江三州造船四百艘以載軍糧

甲午下詔遣營州都督張儉等帥幽營二都督兵及契丹奚靺鞨先擊遼東以觀其勢以太常卿韋挺爲饋運使以民部侍郎崔仁師副之自河北諸州皆受挺節度聽以便宜從事又命太僕少卿蕭銳運河南諸州糧入海銳瑀之子也九月乙未鴻臚奏高麗莫離支貢白金褚遂良曰莫離支弑其君九夷所不容今將討之而納其金此郅鼎之類也臣謂不可受上從之上謂高麗使者曰汝曹皆事高武有官爵莫離支弑逆汝曹不能復讎今更爲之遊說以欺大國罪孰大焉悉以屬大理冬十月甲寅車駕行幸雒

陽十一月壬申至雒陽前宜州刺史鄭元璫已致仕
上以其常從隋煬帝伐高麗召詣行在問之對曰遼
東道遠糧運艱阻東夷善守城攻之不可猝下上曰
今日非隋之比公但聽之張儉等值遼水漲久不得
濟上以爲畏懦召儉詣雒陽至具陳山川險易水草
美惡上悅上聞洛州刺史程名振善用兵召問方略
嘉其才敏卽日拜右驍衛將軍甲午以刑部尙書張
亮爲平壤道行軍大總管帥江淮嶺硤兵四萬長安
雒陽募士三千戰艦五百艘自萊州泛海趨平壤又
以太子詹事左衛率李世勣爲遼東道行軍大總管

帥步騎六萬及蘭河二州降胡趣遼東兩軍合勢並
進庚子諸軍大集於幽州遣行軍總管姜行本少府
少監丘行淹先督眾工造梯衝於安羅山時遠近勇
士應募及獻攻城器械者不可勝數上皆親加損益
取其便宜又手詔諭天下以高麗蓋蘇文弑主虐民
情何可忍今欲巡幸幽薊問罪遼碣所過營頓無爲
勞費且言昔隋煬帝殘暴其下高麗王仁愛其民以
思亂之軍擊安和之眾故不能成功今略言必勝之
道有五一日以大擊小二曰以順討逆三曰以治乘
亂四曰以逸敵勞五曰以悅當怨何憂不克布告元

元勿爲疑懼於是凡頓舍供費之具減者大半十二月辛丑武陽懿公李大亮卒於長安遺表請罷高麗之師 甲寅詔諸軍及新羅百濟奚契丹分道擊高麗

麗

十九年春二月庚戌上自將諸軍發雒陽以特進蕭瑀爲雒陽宮畱守乙卯詔朕發定州後宜令皇太子監國開府儀同三司致仕尉遲敬德上言陛下親征遼東太子在定州長安雒陽心腹空虛恐有立感之變且邊隅小夷不足以勤萬乘願遣偏師征之指期可殄上不從以敬德爲左一馬軍總管使從行 癸

亥上至鄴自爲文祭魏太祖曰臨危制變料敵設奇
一將之智有餘萬乘之才不足是月李世勣軍至幽
州三月丁丑車駕至定州丁亥上謂侍臣曰遼東本
中國之地隋氏四出師而不能得朕今東征欲爲中
國報子弟之讎高麗雪君父之恥耳且方隅大定惟
此未平故及朕之未老用士大夫餘力以取之朕自
發雒陽惟噉肉飯雖舂蔬亦不之進懼其煩擾故也
上見病卒召至御榻前存慰付州縣療之士卒莫不
感悅有不預征名自願以私裝從軍動以千計皆曰
不求縣官勳賞惟願效死遼東上不許上將發太子

悲泣數日上曰今畱汝鎮守輔以俊賢欲使天下識汝風采夫爲國之要在於進賢退不肖賞善罰惡至公無私汝當努力行此悲泣何爲命開府儀同三司高士廉攝太子太傅與劉洎馬周少詹事張行成右庶子高季輔同掌機務輔太子長孫無忌岑文本與吏部尙書楊師道從行壬辰車駕發定州親佩弓矢手結雨衣於鞍後命長孫無忌攝侍中楊師道攝中書令李世勣軍發柳城多張形勢若出懷遠鎮者而潛師北趣甬道出高麗不意夏四月戊戌朔世勣自通定濟遼水至玄菟高麗大駭城邑皆閉門自守壬

寅遼東道副大總管江夏王道宗將兵數千至新城
折衝都尉曹三良引十餘騎直壓城門城中驚擾無
敢出者營州都督張儉將胡兵爲前鋒進渡遼水趨
建安城破高麗兵斬首數千級 丁未車駕發幽州
上悉以軍中資糧器械簿書委岑文本文本夙夜勤
力躬自料配籌筆不去手精神耗竭言辭舉措頗異
平日上見而憂之謂左右曰文本與我同行恐不與
我同返是日遇暴疾而薨其夕上聞嚴鼓聲曰文本
殞沒所不忍聞命撤之時右庶子許敬宗在定州與
高士廉等共知機要文本薨上召敬宗以本官檢校

中書侍郎 癸亥李世勣等拔蓋牟城獲二萬餘口糧十餘萬石張亮帥舟師自東萊渡海襲卑沙城其城四面懸絕惟西門可上程名振引兵夜至副總管王大度先登五月己巳拔之獲男女八千口分遣總管丘孝忠等曜兵於鴨綠水李世勣進至遼東城下庚午車駕至遼澤泥淖二百餘里人馬不可通將作大匠閻立德布土作橋軍不畱行壬申度澤東乙亥高麗步騎四萬救遼東江夏王道宗將四千騎逆擊之軍中皆以爲眾寡懸絕不若深溝高壘以俟車駕之至道宗曰賊恃眾有輕我心遠來疲頓擊之必敗

且吾屬爲前軍當清道以待乘輿乃更以賊遺君父
乎李世勣以爲然果毅都尉馬文舉曰不遇勅敵何
以顯壯士策馬赴敵所向皆靡衆心稍安旣合戰行
軍總管張君義退走唐兵不利道宗收散卒登高而
望見高麗陣亂與驍騎數十衝之左右出入李世勣
引兵助之高麗大敗斬首千餘級丁丑車駕渡遼水
撤橋以堅士卒之心軍於馬首山勞賜江夏王道宗
超拜馬文舉中郎將斬張君義上自將數百騎至遼
東城下見士卒負土填塹上分其尤重者於馬上持
之從官爭負土致城下李世勣攻遼東城晝夜不息

旬有二日上引精兵會之圍其城數百重鼓譟聲震
天地甲申南風急上遣銳卒登衝竿之末焚其西南
樓火延燒城中因麾將士登城高麗力戰不能敵遂
克之所殺萬餘人得勝兵萬餘人男女四萬口以其
城爲遼州乙未進軍白巖城丙申右衛大將軍李思
摩中弩矢上親爲之吮血將士聞之莫不感動烏骨
城遣兵萬餘爲白巖聲援將軍契苾何力以勁騎八
百擊之何力挺身陷陳槩中其腰尙輦奉御薛萬備
單騎往救之拔何力於萬眾之中而還何力氣益憤
束瘡而戰從騎奮擊遂破高麗兵追奔數十里斬首

千餘級會暝而罷萬備萬徹之第也 六月丁酉李世勤攻白巖城西南上臨其西北城主孫代音潛遣腹心請降臨城投刀鉞爲信且曰奴願降城中有不從者上以唐幟與其使曰必降者宜建之城上代音建幟城中人以爲唐兵已登城皆從之上之克遼東也白巖城請降旣而中悔上怒其反覆令軍中曰得城當悉以人物賞戰士李世勤見上將受其降帥甲士數十人請曰士卒所以爭冒矢石不顧其死者貪虜獲耳今城垂拔奈何更受其降孤戰士之心上下馬謝曰將軍言是也然縱兵殺人而虜其妻孥朕所

不忍將軍麾下有功者朕以庫物賞之庶因將軍贖此一城世勩乃退得城中男女萬餘口上臨水設幄受其降仍賜之食八十以上賜帛有差它城之兵在白巖者悉慰諭給糧仗任其所之先是遼東城長史爲部下所殺其省事奉其妻子奔白巖上憐其有義賜帛五匹爲長史造靈輿歸之平壤以白巖城爲巖州以孫代音爲刺史契苾何力瘡重上自爲傅藥推求得刺何力者高突勃付何力使自殺之何力奏稱彼爲其主冒白刃刺臣乃忠勇之士也與之初不相識非有怨讎遂捨之初莫離支遣加尸城七百人戍

蓋牟城李世勣盡虜之其人請從軍自效上曰汝家
皆在加尸汝爲我戰莫離支必殺汝妻子得一人之
力而滅一家我不忍也戊戌皆廩賜遣之己亥以蓋
牟城爲蓋州丁未車駕發遼東丙辰至安市城進兵
攻之丁巳高麗北部耨薩延壽惠真帥高麗靺鞨兵
十五萬救安市上謂侍臣曰今爲延壽策有三引兵
直前連安市城爲壘據高山之險食城中之粟縱靺
鞨掠吾牛馬攻之不可猝下欲歸則泥濘爲阻坐困
吾軍上策也拔城中之眾與之宵遁中策也不度智
能來與吾戰下策也卿曹觀之彼必出下策成擒在

吾日中矣高麗有對盧老年習事謂延壽曰秦王內
芟羣雄外服戎狄獨立爲帝此命世之材今舉海內
之眾而來不可敵也爲吾計者莫若頓兵不戰曠日
持久分遣奇兵斷其運道糧食旣盡求戰不得欲歸
無路乃可勝也延壽不從引軍直進去安市城四十
里上猶恐其低徊不至命左衛大將軍阿史那社爾
將突厥千騎以誘之兵始交而僞走高麗相謂曰易
與耳競進乘之至安市城東南八里依山而陳上悉
召諸將問計長孫無忌對曰臣聞臨敵將戰必先觀
士卒之情臣適行經諸營見士卒聞高麗至皆拔刀

結旆喜形於色此必勝之兵也陛下未冠身親行陳
凡出奇制勝皆上稟聖謀諸將奉成算而已今日之
事乞陛下指蹤上笑曰諸公以此見讓朕當爲諸公
商度乃與無忌等縱數百騎乘高望之觀山川形勢
可以伏兵及出入之所高麗靺鞨合兵爲陳長四十
里江夏王道宗曰高麗傾國以拒王師平壤之守必
弱願假臣精卒五千覆其本根則數十萬之衆可不
戰而降上不應遣使紿延壽曰我以爾國疆臣弑其
主故來問罪至於交戰非吾本心入爾境芻粟不給
故取爾數城俟爾國修臣禮則所失必復矣延壽信

之不復設備上夜召文武計事命李世勣將步騎萬五千陳於西嶺長孫無忌將精兵萬一千爲奇兵自山北出於峽谷以衝其後上自將步騎四千挾鼓角偃旗幟登北山上敕諸軍聞鼓角齊出奮擊因命有司張受降幕於朝堂之側戊午延壽等獨見李世勣布陳勒兵欲戰上望見無忌軍塵起命作鼓角舉旗幟諸軍鼓譟並進延壽等大懼欲分兵禦之而其陳已亂會有雷電龍門人薛仁貴着奇服大呼陷陳所向無敵高麗兵披靡大軍乘之高麗兵大潰斬首二萬餘級上望見仁貴召見拜游擊將軍仁貴安都之

六世孫名禮以字行延壽等將餘眾依山白固上命
諸軍圍之長孫無忌悉撤橋梁斷其歸路己未延壽
惠真帥其眾三萬六千八百人請降入軍門膝行而
前拜伏請命上語之曰東夷少年跳梁海曲至於摧
堅決勝故當不及老人自今復敢與天子戰乎皆伏
地不能對上簡耨薩己下酋長三千五百人授以戎
秩遷之內地餘皆縱之使還平壤皆雙舉手以頽頓
地歡呼聞數十里外收靺鞨三千三百人悉阮之獲
馬五萬匹牛五萬頭鐵甲萬領他器械稱是高麗舉
國大駭後黃城銀城皆自拔遁去數百里無復人煙

上驛書報太子仍與高士廉等書曰朕爲將如此何如更名所幸山曰駐蹕山秋七月辛未上徙營安市城東嶺己卯詔標識戰死者尸俟軍還與之俱歸戊子以高延壽爲鴻臚卿高惠眞爲司農卿張亮軍過建安城下壁壘未固士卒多出樵牧高麗兵奄至軍中駭擾亮素怯踞胡床直視不言將士見之更以爲勇總管張金樹等鳴鼓勒兵擊高麗破之八月甲辰候騎獲莫離支諜者高竹離反接詣軍門上召見解縛問曰何瘦之甚對曰竊道間行不食數日矣命賜之食謂曰爾爲諜宜速反命爲我寄語莫離支欲

知軍中消息可遣人徑詣吾所何必間行辛苦也竹
離徒跣上賜屨而遣之丙午徙營於安市城南上在
遼外凡置營但明斥候不爲塹壘雖逼其城高麗終
不敢出爲寇抄軍士單行野宿如中國焉上之克白
巖也謂李世勣曰吾聞安市城險而兵精其城主材
勇莫離支之亂城守不服莫離支擊之不能下因而
與之建安兵弱而糧少若出其不意攻之必克公可
先攻建安建安下則安市在吾腹中此兵法所謂城
有所不攻者也對曰建安在南海安市在北吾軍糧皆
在遼東今踰安市而攻建安若賊斷吾運道將若之

何不如先攻安市安市下則鼓行而取建安耳上曰以公爲將安得不用公策勿誤吾事世勣遂攻安市安市人望見上旗蓋輒乘城鼓譟上怒世勣請克城之日男子皆阬之安市人聞之益堅守攻久不下高延壽高惠真請於上曰奴旣委身大國不敢不獻其誠欲天子早成大功奴得與妻子相見安市人顧惜其家人自爲戰未易猝拔今奴以高麗十餘萬望旗沮潰國人膽破烏骨城耨薩老耄不能堅守移兵臨之朝至夕克其餘當道小城必望風犇潰然後收其資糧鼓行而前平壤必不守矣羣臣亦言張亮兵在

沙城召之信宿可至乘高麗兇懼併力拔烏骨城渡鴨綠水直取平壤在此舉矣上將從之獨長孫無忌以爲天子親征異於諸將不可乘危徼幸今建安新城之虜眾猶十萬若向烏骨皆躡吾後不如先破安市取建安然後長驅而進此萬全之策也上乃止諸軍急攻安市上聞城中雞彘聲謂李世勣曰圍城積久城中煙火日微今雞彘甚喧此必饗士欲夜出襲我宜嚴兵備之是夜高麗數百人縋城而下上聞之自至城下召兵急擊斬首數十級高麗退走江夏王道宗督眾築土山於城東南隅浸逼其城城中亦增

高其城以拒之士卒分番交戰日六七合衝車礮石
壞其樓堞城中隨立木柵以塞其缺道宗傷足上親
爲之針築山晝夜不息凡六旬用功五十萬山頂去
城數丈下臨城中道宗使果毅傅伏愛將兵屯山頂
以備敵山頽壓城城崩會伏愛私離所部高麗數百
人從城缺出戰遂奪據土山塹而守之上怒斬伏愛
以徇命諸將攻之三日不能克道宗徒跣詣旗下請
罪上曰汝罪當死但朕以漢武殺王恢不如秦穆用
孟明且有破蓋牟遼東之功故特赦汝耳上以遼左
早寒草枯水凍士馬難久畱且糧食將盡癸未敕班

師先拔遼蓋二州戶口渡遼乃耀兵於安市城下而旋城中皆屏跡不出城主登城拜辭上嘉其固守賜縑百匹以勵事君命李世勣江夏王道宗將步騎四萬爲殿乙酉至遼東丙戌渡遼水遼澤泥潦車馬不通命長孫無忌將萬人翦草填道水深處以車爲梁上自繫薪於馬鞘以助役冬十月丙申朔上至蒲溝駐馬督填道諸軍度渤錯水暴風雪士卒沾溼多死者敕然火於道以待之凡征高麗拔立菟橫山蓋牟磨米遼東白巖卑沙麥谷銀山後黃十城徙遼蓋巖三州戶口入中國者七萬人新城建安駐蹕三大戰

斬首四萬餘級戰士死者幾二千人戰馬死者什七八上以不能成功深悔之歎曰魏徵若在不使朕有是行也命馳驛祀徵以少牢復立所製碑召其妻子詣行在勞賜之丙午至營州詔遼東戰亡士卒骸骨並集柳城東南命有司設太牢上自作文以祭之臨哭盡哀其父母聞之曰吾兒死而天子哭之死何所恨上謂薛仁貴曰朕諸將皆老思得新進驍勇者將之無如卿者朕不喜得遼東喜得卿也丙辰上聞太子奉迎將至從飛騎三千人馳入臨渝關道逢太子之上之發定州也指所御褐袍謂太子曰俟見汝乃易

此袍耳在遼左雖盛暑流汗弗之易及秋穿敗左右
請易之上曰軍士衣多弊吾獨御新衣可乎至是太
子進新衣乃易之諸軍所虜高麗民萬四千口先集
幽州將以賞軍士上愍其父子夫婦離散命有司平
其直悉以錢布贖爲民歡呼之聲三日不息十一月
辛未車駕至幽州高麗民迎於城東拜舞號呼宛轉
於地塵埃彌望 丙戌車駕至定州 壬辰車駕發
定州 戊申至并州
二十年春二月乙未上發并州三月己巳車駕還京
師上謂李靖曰吾以天下之眾困於小夷何也靖曰

此道宗所解上顧問江夏王道宗具陳在駐蹕時乘
虛取平壤之言上悵然曰當時忽忽吾不憶也 閏

月戊戌罷遼州都督府及巖州 夏五月甲寅高麗

王藏及莫離支蓋金遣使謝罪并獻二美女上還之

金卽蘇文也 上自高麗還蓋蘇文益驕恣雖遣使

奉表其言率皆詭誕又待唐使者倨慢常窺伺邊隙

屢敕令勿攻新羅而侵陵不止壬申詔勿受其朝貢

更議討之 丙戌車駕至京師

二十一年上將復伐高麗朝議以爲高麗依山爲城
攻之不可猝拔前大駕親征國人不得耕種所克之

城悉收其穀繼以旱災民大半乏食今若數遣偏師更迭擾其疆場使彼疲於奔命釋耒入堡數年之間千里蕭條則人心自離鴨綠之北可不戰而取矣上從之三月以左武衛大將軍牛進達爲青丘道行軍大總管右武侯將軍李海岸副之發兵萬餘人乘樓船自萊州汎海而入又以太子詹事李世勣爲遼東道行軍大總管右武衛將軍孫貳朗等副之將兵三千人因營州都督府兵自新城道入兩軍皆選習水善戰者配之 李世勣軍旣度遼歷南蘇等數城高麗多背城拒戰世勣擊破其軍焚其羅郭而還 秋

七月牛進達李海岸入高麗境凡百餘戰無不捷攻石城拔之達至積利城下高麗兵萬餘人出戰海岸擊破之斬首二千級八月戊戌敕宋州刺史王波利等發江南十二州工人造大船數百艘欲以征高麗冬十二月高麗王使其子莫離支任武入謝罪上許之

二十二年春正月新羅王金善德卒以善德妹真德爲柱國封樂浪郡王遣使冊命丙午詔以右武衛大將軍薛萬徹爲青丘道行軍大總管右衛將軍裴行方副之將兵三萬餘人及樓船戰艦自萊州泛海

以擊高麗 三月充容長城徐惠以上東征高麗西
討龜茲上疏諫其略曰以有盡之農功填無窮之巨
浪圖未獲之他眾喪已成之我軍昔秦皇并吞六國
反速危亡之基晉武奄有三方翻成覆敗之業豈非
矜功恃大棄德輕邦圖利忘危肆情縱欲之所致乎
是知地廣非常安之術人勞乃易亂之源也上善其
言 夏四月甲子烏胡鎮將古神感將兵浮海擊高
麗遇高麗步騎五千戰於易山破之其夜高麗萬餘
人襲神感船神感設伏又破之而還 六月上以高
麗困弊議以明年發三十萬眾一舉滅之或以爲大

軍東征須備經歲之糧非畜乘所能載宜具舟艦爲水運隋末劍南獨無寇盜屬者遼東之役劍南復不預及其百姓富庶宜使之造舟艦上從之秋七月遣右領左右府長史強偉於劍南道伐木造舟艦大者或長百尺其廣半之別遣使行水道自巫峽抵江揚趣萊州司空梁文昭公房玄齡疾篤謂諸子曰吾受主上厚恩今天下無事惟東征未已羣臣莫敢諫吾知而不言死有餘責乃上表諫以爲老子曰知足不辱知止不殆陛下威名功德亦可足矣拓地開疆亦可止矣且陛下每決一重囚必令三覆五奏進素

膳止音樂者重人命也今驅無罪之士卒委之鋒刃之下使肝腦塗地獨不足愍乎向使高麗違失臣節誅之可也侵擾百姓滅之可也它日能爲中國患除之可也今無此三條而坐煩中國內爲前代雪恥外爲新羅報讎豈非所存者小所損者大乎願陛下許高麗自新焚陵波之船罷應募之眾自然華夷慶賴遠肅邇安臣旦夕入地儻蒙錄此哀鳴死且不朽玄齡子遺愛尙上女高陽公主上謂公主曰彼病篤如此尙能憂我國家上自臨視握手與訣悲不自勝癸卯薨八月丁丑敕越州都督府及婺洪等州造海

船及雙舫千一百艘 九月己丑新羅奏爲百濟所
攻破其十三城 冬十二月癸未新羅相金春秋及
其子文王入見春秋眞德之弟也上以春秋爲特進
文王爲左武衛將軍春秋請改章服從中國內出冬
服賜之

二十三年夏五月己巳上崩壬申遺詔太子卽位罷
遼東之役

高宗永徽二年百濟遣使入貢上戒之使勿與新羅
高麗相攻不然吾將發兵討汝矣

三年春正月己未朔吐谷渾新羅高麗百濟並遣使

入貢

五年夏閏四月壬辰新羅女王金眞德卒詔立其弟春秋爲新羅王

六年高麗與百濟靺鞨連兵侵新羅北境取三十三城新羅王春秋遣使求援二月乙丑遣營州都督程名振左衛中郎將蘇定方發兵擊高麗 夏五月壬午名振等度遼水高麗見其兵少開門度貴端水逆戰名振等奮擊大破之殺獲千餘人焚其外郭及村落而還

顯慶三年夏六月營州都督兼東夷都護程名振右

領軍中郎將薛仁貴將兵攻高麗之赤烽鎮拔之斬首四百餘級捕虜百餘人高麗遣其大將豆方婁帥眾三萬拒之名振以契丹逆擊大破之斬首二千五百級

四年冬十一月右領軍中郎將薛仁貴等與高麗將溫沙門戰於橫山破之

五年春三月百濟恃高麗之援數侵新羅新羅王春秋上表求救辛亥以左武衛大將軍蘇定方爲神丘道行軍大總管帥左驍衛將軍劉伯英等水陸齊進以伐百濟以春秋爲嶠夷道行軍總管將新羅之眾

與之合勢 秋八月蘇定方引軍自成山濟海百濟
據熊津江口以拒之定方進擊破之百濟死者數千
人餘皆潰走定方水陸齊進直趣其都城未至二十
餘里百濟傾國來戰大破之殺萬餘人追犇入其郭
百濟王義慈及太子隆逃於北境定方進圍其城義
慈次子泰自立爲王帥眾固守隆子文思曰王與太
子皆在而叔遽擁兵自王借使能卻唐兵我父子必
不全矣遂帥左右踰城來降百姓皆從之泰不能止
定方命軍士登城立幟泰窘迫開門請命於是義慈
隆及諸城主皆降百濟故有五部分統三十七郡二

百城七十六萬戶詔以其地置熊津等五都督府以其酋長爲都督刺史 冬十一月戊戌朔上御則天門樓受百濟俘自其王義慈以下皆釋之 十二月壬午以左驍衛大將軍契苾何力爲涇江道行軍大總管左武衛大將軍蘇定方爲遼東道行軍大總管左驍衛將軍劉伯英爲平壤道行軍大總管蒲州刺史程名振爲鏤方道總管將兵分道擊高麗青州刺史劉仁軌坐督海運覆船以白衣從軍自效 龍朔元年春正月乙卯募河南北淮南六十七州兵得四萬四千餘人詣平壤鏤方行營戊午以鴻臚卿

蕭嗣業爲扶餘道行軍總管帥迴紇等諸部兵詣平壤三月丙申朔上與羣臣及外夷宴於雒陽城門觀屯營新教之舞謂之一戎大定樂時上欲親征高麗以象用武之勢也初蘇定方旣平百濟畱郎將劉仁願鎮守百濟府城又以左衛中郎將王文度爲熊津都督撫其餘眾文度濟海而卒百濟僧道琛故將福信聚眾據周畱城迎故王子豐於倭國而立之引兵圍仁願於府城詔起劉仁軌檢校帶方州刺史將王文度之眾便道發新羅兵以救仁願仁軌喜曰天將富貴此翁矣於州司請唐歷及廟諱以行曰吾

欲掃平東夷。頒大唐正朔於海表。仁軌御軍嚴整。轉鬪而前。所向皆下。百濟立兩柵於熊津江口。仁軌與新羅兵合擊破之。殺溺死者萬餘人。道琛等乃釋府城之圍。退保任存城。新羅糧盡。引還。道琛自稱領軍將軍。福信自稱霜岑將軍。招集徒眾。其勢益張。仁軌眾少。與仁願合軍休息。士卒上詔新羅出兵。新羅王春秋奉詔遣其將金欽將兵救仁軌等。至古泗。福信邀擊敗之。欽自葛嶺遁還。新羅不敢復出。福信尋殺道琛。專總國兵。夏四月庚辰。以任雅相爲湏江道行軍總管。契苾何力爲遼東道行軍總管。蘇定方

爲平壤道行軍總管與蕭嗣業及諸胡兵凡三十五
軍水陸分道並進上欲自將大軍繼之癸巳皇后抗
表諫親征高麗詔從之秋七月甲戌蘇定方破高
麗於涇江屢戰皆捷遂圍平壤城九月癸巳朔特
進新羅王春秋卒以其子法敏爲樂浪郡王新羅王
高麗蓋蘇文遣其子男生以精兵數萬守鴨綠水
諸軍不得度契苾何力至值冰大合何力引眾乘冰
度水鼓譟而進高麗大潰追犇數十里斬首三萬級
餘眾悉降男生僅以身免會有詔班師乃還
二年春二月甲戌涇江道大總管任雅相薨於軍戊

寅左驍衛將軍白州刺史沃沮道總管龐孝泰與高麗戰於蛇水之上軍敗與其子十二人皆戰死蘇定方圍平壤久不下會大雪解圍而還秋七月丁巳熊津都督劉仁願帶方州刺史劉仁軌大破百濟於熊津之東拔真峴城初仁願仁軌等屯熊津城上與之敕書以平壤軍回一城不可獨固宜拔就新羅若金法敏藉卿畱鎮宜且停彼若其不須卽宜泛海還也將士咸欲西歸仁軌曰人臣徇公家之利有死無貳豈得先念其私主上欲滅高麗故先誅百濟畱兵守之制其心腹雖餘寇充斥而守備甚嚴宜礪兵秣

馬擊其不意理無不克旣捷之後士卒心安然後分
兵據險開張形勢飛表以聞更求益兵朝廷知其有
成必命將出師聲援纔接凶醜自殲非直不棄成功
實亦永清海表今平壤之軍旣還熊津又拔則百濟
餘燼不日更興高麗逋寇何時可滅且今以一城之
地居敵中央苟或動足卽爲擒虜縱入新羅亦爲羈
客脫不如意悔不可追況福信凶悖殘虐君臣猜離
行相屠戮正宜堅守觀變乘便取之不可動也眾從
之時百濟王豐與福信等以仁願等孤城無援遣使
謂之曰大使等何時西還當遣相送仁願仁軌知其

無備忽出擊之拔其支羅城及峴城大山沙井等柵
殺獲甚眾分兵守之福信等以真峴城險要加兵守
之仁軌伺其稍懈引新羅兵夜傳城下攀草而上比
明入據其城遂通新羅運糧之路仁願乃奏請益兵
詔發淄青萊海之兵七千人以赴熊津福信專權與
百濟王豐浸相猜忌福信稱疾臥於窟室欲俟豐問
疾而殺之豐知之帥親信襲殺福信遣使詣高麗倭
國乞師以拒唐兵

三年秋八月戊申上以海東累歲用兵百姓困於征
調士卒戰溺死者甚眾詔罷三十六州所造船遣司

元太常伯竇德立等分詣十道問人疾苦黜陟官吏
德立毅之曾孫也 九月戊午熊津道行軍總管右

威衛將軍孫仁師等破百濟餘眾及倭兵於白江拔
其周留城初劉仁願劉仁軌旣克真峴城詔孫仁師
將兵浮海助之百濟王豐南引倭人以拒唐兵仁師
與仁願仁軌合軍勢大振諸將以加林城水陸之衝
欲先攻之仁軌曰加林險固急攻則傷士卒緩之則
曠日持久周留城虜之巢穴羣兇所聚除惡務本宜
先攻之若克周留諸城自下於是仁師仁願與新羅
王法敏將陸軍以進仁軌與別將杜爽扶餘隆將水

軍及糧船自熊津入白江以會陸軍同趣周畱城遇倭兵於白江口四戰皆捷焚其舟四百艘煙炎灼天海水皆赤百濟王豐脫身犇高麗王子忠勝忠志等帥眾降百濟盡平唯別帥遲受信據任存城不下初百濟西部人黑齒常之長七尺餘驍勇有謀略仕百濟爲達率兼郡將猶中國刺史也蘇定方克百濟常之帥所部隨眾降定方繫其王及太子縱兵劫掠壯者多死常之懼與左右十餘人遁歸本部收集亡散保任存山結柵以自固旬日間歸附者三萬餘人定方遣兵攻之常之拒戰唐兵不利常之復取二百餘

城定方不能克而還常之與別部將沙吒相如各據險以應福信百濟旣敗皆帥其眾降劉仁軌使常之相如自將其眾取任存城仍以糧仗助之孫仁師曰此屬獸心何可信也仁軌曰吾觀二人皆忠勇有謀敦信重義但鄉者所託未得其人今正是其感激立效之時不用疑也遂給其糧仗分兵隨之攻拔任存城遲受信棄妻子犇高麗詔畱劉仁軌將兵鎮百濟召孫仁師劉仁願還百濟兵火之餘比屋彫殘僵尸滿野仁軌始命瘞骸骨籍戶口理村聚署官長通道途立橋梁補堤堰復陂塘課耕桑賑貧乏養孤老立

唐社稷禋正朔及廟諱百濟大悅闔境各安其業然後修屯田儲糗糧訓士卒以圖高麗劉仁願至京師上問之曰卿在海東前後奏事皆合機宜復有文理卿本武人所能如是仁願曰此皆劉仁軌所爲非臣所及也上悅加仁軌六階正除帶方州刺史爲築第長安厚賜其妻子遣使齎璽書勞勉之上官儀曰仁軌遭黜削而能盡忠仁願秉節制而能推賢皆可謂君子矣

麟德元年冬十月庚辰檢校熊津都督劉仁軌上言臣伏覩所存戍兵疲羸者多勇健者少衣服貧弊唯

思西歸無心展效臣問以往在海西見百姓人人應募爭欲從軍或請自辦衣糧謂之義征何爲今日士卒如此咸言今日官府與曩時不同人心亦殊曩時東西征役身沒王事並蒙敕使弔祭追贈官爵或以死者官爵回授子弟凡度遼海者皆賜勳一轉自顯慶五年以來征人屢經度海官不記錄其死者亦無人誰何州縣每發百姓爲兵其壯而富者行錢參逐皆亡匿得免貧者身雖老弱被發卽行頃者破百濟及平壤苦戰當是時將帥號令許以勳賞無所不至及達西岸唯聞枷鎖推禁奪賜破勳州縣追呼無以

自存公私困弊不可悉言以是昨發海西之日已有逃亡自殘者非獨至海外而然也又本因征役授勳級以爲榮寵而比年出征皆使勳官挽引勞苦與白丁無殊百姓不願從軍率皆由此臣又問曩日士卒畱鎮五年尙得支濟今爾等始經一年何爲如此單露咸言初發家日惟令備一年資裝今已一年未有還期臣撿校軍士所畱衣今冬僅可充事來秋以往全無準擬陛下畱兵海外欲殄滅高麗百濟高麗舊相黨援倭人雖遠亦共爲影響若無鎮兵還成一國今旣資戍守又置屯田所藉士卒同心同德而眾有

此議何望成功自非有所更張厚加慰勞明賞重罰
以起士心若止如今日已前處置恐師眾疲老立效
無日逆耳之事或無人爲陛下盡言故臣披露肝膽
昧死奏陳上深納其言遣右威衛將軍劉仁願將兵
度海以代舊鎮之兵仍敕仁軌俱還仁軌謂仁願曰
國家懸軍海外欲以經略高麗其事非易今收穫未
畢而軍吏與士卒一時代去軍將又歸夷人新服眾
心未安必將生變不如且畱舊兵漸令收穫辦具資
糧節級遣還軍將且畱鎮撫未可還也仁願曰吾前
還海西大遭讒謗云吾多畱兵眾謀據海東幾不免

禍今日惟知準敕豈敢擅有所爲仁軌曰人臣苟利於國知無不爲豈恤其私乃上表陳便宜自請留鎮海東上從之仍以扶餘隆爲熊津都尉使招輯其餘眾

二年秋七月上命熊津都尉扶餘隆與新羅王法敏釋去舊怨八月壬子同盟於熊津城劉仁軌以新羅百濟耽羅倭國使者浮海西還會祠泰山高麗亦遣太子福男來侍祠

乾封元年夏五月高麗泉蓋蘇文卒長子男生代爲莫離支初知國政出巡諸城使其弟男建男產知畱

後事或謂二弟曰男生惡二弟之逼意欲除之不如
先爲計二弟初未之信又有告男生者曰二弟恐兄
還奪其權欲拒兄不納男生潛遣所親往平壤伺之
二弟收掩得之乃以王命召男生男生懼不敢歸男
建白爲莫離支發兵討之男生走保別城使其子獻
誠詣闕求救六月壬寅以右驍衛大將軍契苾何力
爲遼東道安撫大使將兵救之以獻誠爲右武衛將
軍使爲鄉導又以左金吾衛將軍龐同善營州都督
高侃爲行軍總管同討高麗 秋九月龐同善大破
高麗兵泉男生帥眾與同善合詔以男生爲特進遼

東大都督兼平壤道安撫大使封玄菟郡公 冬十
二月己酉以李勣爲遼東道行軍大總管兼安撫大
使以司列少常伯安陸郝處俊副之以擊高麗龐同
善契苾何力並爲遼東道行軍副大總管兼安撫大
使如故其水陸諸軍總管并運糧使竇義積獨孤卿
雲郭待封等並受勣處分河北諸州租賦悉詣遼東
給軍用

二年秋九月辛未李勣拔高麗之新城使契苾何力
守之勣初度遼謂諸將曰新城高麗西邊要害不先
得之餘城未易取也遂攻之城人師夫仇等縛城主

開門降勣引兵進擊一十六城皆下之龐同善高侃
尙在新城泉男建遣兵襲其營左武衛將軍薛仁貴
擊破之侃進至金山與高麗戰不利高麗乘勝逐北
仁貴引兵橫擊之大破高麗斬首五萬餘級拔南蘇
木抵蒼巖三城與泉男生軍合郭待封以水軍自別
道趣平壤勣遣別將馮師本載糧仗以資之師本船
破失期待封軍中饑窘欲作書與勣恐爲虜所得知
其虛實乃作離合詩以與勣勣怒曰軍事方急何以
詩爲必斬之行軍管記通事舍人河南元萬頃爲釋
其義勣乃更遣糧仗赴之萬頃作檄高麗文曰不知

守鴨綠之險泉男建報曰謹聞命矣卽移兵據鴨綠
津唐兵不得度上聞之流萬頃於嶺南郝處俊在高
麗城下未及成列高麗奄至軍中大駭處俊據胡牀
方食乾糲潛簡精銳擊敗之將士服其膽略

總章元年春二月壬午李勣等拔高麗扶餘城薛仁
貴旣破高麗於金山乘勝將三千人將攻扶餘城諸
將以其兵少止之仁貴曰兵不必多顧用之何如耳
遂爲前鋒以進與高麗戰大破之殺獲萬餘人遂拔
扶餘城扶餘州中四十餘城皆望風請服侍御史雒
陽賈言忠奉使自遼東還上問以軍事言忠對曰高

麗必平上曰卿何以知之對曰隋煬帝東征而不克者人心離怨故也先帝東征而不克者高麗未有釁也今高藏微弱權臣擅命蓋蘇文死男建兄弟內相攻奪男生傾心內附爲我鄉導彼之情僞靡不知之以陛下明聖國家富強將士盡力以乘高麗之亂其勢必克不俟再舉矣且高麗連年饑饉妖異屢降人心危駭其亡可翹足待也上又問遼東諸將孰賢對曰薛仁貴勇冠三軍龐同善雖不善鬪而持軍嚴整高侃勤儉自處忠果有謀契苾何力沈毅能斷雖頗忌刻而有統御之才然夙夜小心忘身憂國皆莫及

李勣也上深然其言泉男建復遣兵五萬人救扶餘城與李勣等遇於薛賀水合戰大破之斬獲三萬餘人進攻大行城拔之秋九月癸巳李勣拔平壤勣旣克大行城諸軍出它道者皆與勣會進至鴨綠柵高麗發兵拒戰勣等奮擊大破之追奔二百餘里拔辱夷城諸城遁逃及降者相繼契苾何力先引兵至平壤城下勣軍繼之圍平壤月餘高麗王藏遣泉男產帥首領九十八人持白幡詣勣降勣以禮接之泉男建猶閉門拒守頻遣兵出戰皆敗男建以軍事委僧信誠信誠密遣人詣勣請爲內應後五日信誠開

門勦縱兵登城鼓譟焚城四角男建自刺不死遂擒
之高麗悉平 冬十月李勣將至上命先以高藏等
獻於昭陵具軍容奏凱歌入京師獻於太廟十二月
丁巳上受俘於含元殿以高藏政非已出赦以爲司
平太常伯員外同正以泉男產爲司宰少卿僧信誠
爲銀青光祿大夫泉男生爲右衛大將軍李勣以下
封賞有差泉男建流黔中扶餘豐流嶺南分高麗五
部百七十六城六十九萬餘戶爲九都督府四十二
州百縣置安東都護府於平壤以統之擢其酋帥有
功者爲都督刺史縣令與華人參理以右威衛大將

軍薛仁貴檢校安東都護總兵二萬人以鎮撫之丁卯上祀南郊告平高麗以李勣爲亞獻己巳謁太廟二年高麗之民多離叛者敕徙高麗戶三萬八千三百於江淮之南及山南京西諸州空曠之地畱其貧弱者使守安東

咸亨元年夏四月高麗酋長劍牟岑反立高藏外孫安舜爲主以左監門大將軍高侃爲東州道行軍總管發兵討之安舜殺劍牟岑奔新羅

二年秋七月乙未朔高侃破高麗餘眾於安市城三年冬十二月高侃與高麗餘眾戰於白水山破之

新羅遣兵救高麗侃擊破之

四年夏閏五月燕山道總管右領軍大將軍李謹行大破高麗叛者於瓠蘆河之西俘獲數千人餘眾皆奔新羅時謹行妻劉氏畱伐奴城高麗引靺鞨攻之劉氏擐甲帥眾守城久之虜退上嘉其功封燕國夫人謹行靺鞨人突地稽之子也武力絕人爲眾夷所憚

上元元年春正月壬午以左庶子同中書門下三品劉仁軌爲雞林道大總管衛尉卿李弼右領軍大將軍李謹行副之發兵討新羅時新羅王法敏旣納高

麗叛眾又據百濟故地使人守之上大怒詔削法敏官爵其弟右驍衛員外大將軍臨海郡公仁問在京師立以爲新羅王使歸國

二年春二月劉仁軌大破新羅之眾於七重城又使靺鞨浮海略新羅之南境斬獲甚眾仁軌引兵還詔以李謹行爲安東鎮撫大使屯新羅之買肖城以經略之三戰皆捷新羅乃遣使入貢且謝罪上赦之復新羅王法敏官爵金仁問中道而還改封臨海郡公儀鳳元年春二月甲戌徙安東都護府於遼東故城先有華人任安東官者悉罷之徙熊津都督府於建

安故城其百濟戶口先徙徐兗等州者皆置於建安
二年 初劉仁軌引兵自熊津還扶餘隆畏新羅之
逼不敢畱尋亦還朝二月丁巳以工部尙書高藏爲
遼東州都督封朝鮮王遣歸遼東安輯高麗餘眾高
麗先在諸州者皆遣與藏俱歸又以司農卿扶餘隆
爲熊津都督封帶方王亦遣歸安輯百濟餘眾仍移
安東都護府於新城以統之時百濟荒殘命隆寓居
高麗之境藏在遼東謀叛潛與靺鞨通召還徙邛州
而死散徙其人於河南隴右諸州貧者畱安東城傍
高麗舊城沒於新羅餘眾散入靺鞨及突厥隆亦竟

不敢還故地高氏扶餘氏遂亡

開耀元年冬十月丁亥新羅王法敏卒遣使立其子
政明

張溥曰唐太宗說高祖起兵太原立克長安降
李密於黎陽俘竇建德於河北禽王世充於東
都芟劉武周於并州翦劉黑闥於山東夷蕭銑
於江陵殄薛仁果於涇水六年而定天下卽位
以後突厥之渠繫頸闕庭北海之濱悉爲州縣
史稱除亂比湯武用兵若黃帝於古未有也獨
遼東一舉拔高麗十城斬首四萬不能成功心

懷哀痛至馳驛祀魏徵柳城祭戰士幾於漢武
之悔輪臺儒者責帝玩武困於小夷然貞觀十
六年陳大德出使高麗歸言其國可取帝閔山
東彫瘵未忍勞之十七年鄧素請增懷遠戍兵
復不許反遣使冊高麗王藏爲遼東郡王旣新
羅來言高麗百濟爲難猶璽書往諭未卽加兵
帝亦可謂有容矣且泉蓋蘇文手弑其王建武
而立藏亂賊首逆當移六師非若隋大業時高
麗王元之無罪也新羅入貢高麗與百濟謀絕
其路啟釁自夷非若隋煬帝幸啟明帳中欲脅

高麗入朝而伐之也李世勣拔蓋牟張亮拔卑沙帝拔遼東白巖高延壽高惠真率眾請降勝勢在唐非若隋宇文述等九軍大敗於於薩水也然而無功同者一病於親征一病於專攻安市城而不直取平壤隋煬之伐高麗也庾質請畱車駕祇命猛將勁卒倍道兼行尉遲敬德勸太宗亦然帝不能鑒也隋之銳師頓於遼東唐之銳師頓於安市集兵萬里致命一城中國雖善戰不如東夷之善守也高祖創漢業而有白登之圍太宗創唐業而有遼東之挫得之四海

失之一隅英雄同憤沒而不忘是以班師以來
帝喜怒失恆敕勒請吏備禮告廟勒詩靈州姑
發無聊以蓋前恥未幾復造大船謀征高麗遺
詔乃罷斯誠痛失足於末路結長恨於身後矣
高宗繼之乾封初蓋蘇文死三子相爭李勣等
遂平高麗用兵之將非勇於昔日也又臨之以
庸主大功忽立賈言忠所云前未有釁今乘其
亂也嗚呼伐匈奴者武帝而受朝者元帝伐高
麗者太宗而蕩平者高宗夷狄廢興彼各有時
豈盡繇中國兵力哉

通鑑紀事本末卷一百七十四

通鑑紀事本末卷一百七十五

宋建安袁樞編輯

明太倉張溥論正

吐蕃請和

唐太宗貞觀八年冬十一月甲申吐蕃贊普棄宗弄
讚遣使入貢仍請昏吐蕃在吐谷渾西南近世浸彊
蠶食它國土宇廣大勝兵數十萬然未嘗通中國其
王稱贊普俗不言姓王族皆曰論宦族皆曰尚棄宗
弄讚有勇略四鄰畏之上遣使者馮德遐往慰撫之
十二年初上遣使者馮德遐撫慰吐蕃吐蕃聞突

厥吐谷渾皆尚公主遣使隨德遐入朝多齎金寶奉表求婚上未之許使者還言於贊普棄宗弄讚曰臣初至唐唐待我甚厚許尚公主會吐谷渾王入朝相離間唐禮遂衰亦不許婚弄讚遂發兵擊吐谷渾吐谷渾不能支遁於青海之北民畜多爲吐蕃所掠吐蕃進破党項白蘭諸羌帥眾二十餘萬屯松州西境遣使貢金帛云來迎公主尋進攻松州敗都督韓威羌酋閣州刺史別叢臥施諾州刺史把利步利並以州叛歸之連兵不息其大臣諫不聽而自縊者凡八輩八月壬寅以吏部尚書侯君集爲當彌道行軍大總管

甲辰以右領軍大將軍執失思力爲白蘭道左武衛將軍牛進達爲闊水道左領軍將軍劉簡爲洮河道行軍總管督步騎五萬擊之吐蕃攻城十餘日進達爲先鋒九月辛亥掩其不備敗吐蕃於松州城下斬首千餘級弄讚懼引兵退遣使謝罪因復請婚上許之

十四年冬閏十月丙辰吐蕃贊普遣其相祿東贊獻金五千兩及珍玩數百以請昏上許以文成公主妻之

十五年春正月甲戌以吐蕃祿東贊爲右衛大將軍

上嘉祿東贊善應對以琅邪公主外孫段氏妻之辭
曰臣國中自有婦父母所聘不可棄也且贊普未得
謁公主陪臣何敢先娶上益賢之然欲撫以厚恩竟
不從其志 丁丑命禮部尚書江夏王道宗持節送
文成公主於吐蕃贊普大喜見道宗盡子婿禮幕中
國衣服儀衛之美爲公主別築城郭宮室而處之自
服紈綺以見公主其國人皆以赭塗面公主惡之贊
普下令禁之亦漸革其猜暴之性遣子弟入國學受
詩書

二十三年上以吐蕃贊普弄讚爲駙馬都尉封西海

郡王贊普致書於長孫無忌等云天子初卽位臣下有
有不忠者當勒兵赴國討除之

高宗永徽元年夏五月壬戌吐蕃贊普弄讚卒其嫡
子早死立其孫爲贊普贊普幼弱政事皆決於國相
祿東贊祿東贊性明達嚴重行兵有法吐蕃所以彊
大威服氐羌皆其謀也

顯慶三年冬十月庚申吐蕃贊普來請婚

五年八月吐蕃祿東贊遣其子起政將兵擊吐谷渾
以吐谷渾內附故也

龍朔三年夏五月吐蕃與吐谷渾互相攻各遣使上

表論曲直更來求援上皆不許吐谷渾之臣素和貴有罪逃犇吐蕃具言吐谷渾虛實吐蕃發兵擊吐谷渾大破之吐谷渾可汗曷鉢與弘化公主帥數千帳棄國走依涼州請徙居內地上以涼州都督鄭仁泰爲青海道行軍大總管帥右武衛將軍獨孤卿雲辛文陵等分屯涼鄯二州以備吐蕃 六月戊申又以左武衛大將軍蘇定方爲安集大使節度諸軍爲吐谷渾之援吐蕃祿東贊屯青海遣使者論仲琮入見表陳吐谷渾之罪且請和親上不許遣左衛郎將劉文祥使於吐蕃降璽書責讓之

麟德二年春二月丁卯吐蕃遣使入見請復與吐谷
渾和親仍求赤水地畜牧上不許

咸亨元年夏四月吐蕃陷西域十八州又與于闐襲
龜茲撥換城陷之罷龜茲于闐焉耆疎勒四鎮辛亥
以右衛大將軍薛仁貴爲邏娑道行軍大總管左衛
員外大將軍阿史那道真左衛將軍郭待封副之以
討吐蕃且援送吐谷渾還故地 秋八月郭待封先
與薛仁貴並列及征吐蕃恥居其下仁貴所言待封
多違之軍至大非川將趣烏海仁貴曰烏海險遠軍
行甚難輜重自隨難以趨利宜畱二萬人爲兩柵於

大非嶺上輜重悉置柵內吾屬帥輕銳倍道兼行掩其未備破之必矣仁貴帥所部前行擊吐蕃於河口大破之斬獲甚眾進屯烏海以俟待封待封不用仁貴策將輜重徐進未至烏海遇吐蕃二十餘萬待封軍大敗還走悉棄輜重仁貴退屯大非川吐蕃相論欽陵將兵四十餘萬就擊之唐兵大敗死傷略盡仁貴待封與阿史那道真並脫身免與欽陵約和而還敕大司憲樂彥瑋卽軍中按其敗狀械送京師三人皆免死除名欽陵祿東贊之子也與弟贊婆悉多于勃論皆有才略祿東贊卒欽陵代之秉政三弟將兵

居外鄰國畏之 閏九月甲寅以左相姜恪爲涼州道行軍大總管以禦吐蕃

三年夏四月吐蕃遣其大臣仲琮入貢上問以吐蕃風俗對曰吐蕃地薄氣寒風俗朴魯然法令嚴整上下一心議事常自下而起因人所利而行之斯所以能持久也上詰以吞滅吐谷渾敗薛仁貴寇逼涼州事對曰臣受命貢獻而已軍旅之事非所聞也上厚賜而遣之癸未遣都水使者黃仁素使於吐蕃上元二年春正月辛未吐蕃遣其大臣論吐渾彌來請和且請與吐谷渾復修鄰好上不許

儀鳳元年春閏三月吐蕃寇鄯廓河芳等州敕左監門衛中郎將令狐智通發興鳳等州兵以禦之己卯詔以吐蕃犯塞停封中嶽乙酉以雒州牧周王顯爲洮州道行軍元帥將工部尚書劉審禮等十二總管并州大都督相王輪爲涼州道行軍元帥將左衛大將軍契苾何力等以討吐蕃二王皆不行 秋八月乙未吐蕃寇疊州

二年夏五月吐蕃寇扶州之臨河鎮擒鎮將杜孝昇令齎書說松州都督武居寂使降孝昇固執不從吐蕃軍還捨孝昇而去孝昇復帥餘眾拒守詔以孝昇

爲游擊將軍 冬十二月乙卯詔大發兵討吐蕃
三年秋七月李敬玄奏破吐蕃於龍支 九月丙寅
李敬玄將兵十八萬與吐蕃將論欽陵戰於青海之
上兵敗工部尚書左衛大將軍彭城僖公劉審禮爲
吐蕃所虜時審禮將前軍深入頓於濠所爲虜所攻
敬玄懦怯按兵不救聞審禮戰沒狼狽還走頓於承
風嶺阻泥溝以自固虜屯兵高岡以壓之左領軍員
外將軍黑齒常之夜帥敢死之士五百人襲擊虜營
虜眾潰亂其將跋地設引兵遁去敬玄乃收餘眾還
鄯州審禮諸子自縛詣闕請入吐蕃贖其父敕聽次

子易從詣吐蕃省之比至審禮已病卒易從晝夜號哭不絕聲吐蕃哀之還其尸易從徒跣負之以歸上嘉黑齒常之之功擢拜左武衛將軍充河源軍副使李敬立之西征也監察御史原武婁師德應猛士詔從軍及敗敕師德收集散亡軍乃復振因命使於吐蕃吐蕃將論贊婆迎之赤嶺師德宣導上意諭以禍福贊婆甚悅爲之數年不犯邊師德遷殿中侍御史充河源軍司馬兼知營田事上以吐蕃爲憂悉召侍臣謀之或欲和親以息民或欲嚴設守備俟公私富實而討之或欲亟發兵擊之議竟不決賜食而遣之

太學生宋城魏元忠上封事言禦吐蕃之策以爲理
國之要在文與武今言文者則以辭華爲首而不及
經綸言武者則以騎射爲先而不知方略是皆何益
於理亂哉故陸機著辨亡之論無救河橋之敗養由
基射穿七札不濟鄆陵之師此已然之明效也古語
有之人無常俗政有理亂兵無彊弱將有巧拙故選
將當以智略爲本勇力爲末今朝廷用人類取將門
子弟及死事之家彼皆庸人豈足當閫外之任李左
車陳湯呂蒙孟觀皆出貧賤而立殊功未聞其家代
爲將也夫賞罰者軍國之切務苟有功不賞有罪不

誅雖堯舜不能以致理議者皆云近日征伐虛有賞格而無事實蓋由小才之吏不知大體徒惜勲庸恐虛倉庫不知士不用命所損幾何黔首雖微不可欺罔豈得懸不信之令設虛賞之科而望其立功乎自蘇定方征遼東李勣破平壤賞絕不行勲仍淹滯不聞斬一臺郎戮一令史以謝勲人大非川之敗薛仁貴郭待封等不卽重誅曷使早誅仁貴等則自餘諸將豈敢失利於後哉臣恐吐蕃之平非旦夕可冀也又出師之要全資馬力臣請開畜馬之禁使百姓皆得畜馬若官軍大舉委州縣長吏以官錢增價市之

則皆爲官有彼胡虜恃馬力以爲彊若聽人間市而畜之乃是損彼之彊爲中國之利也先是禁百姓畜馬故元忠言之上善其言召見令直中書省仗內供奉

調露元年春二月壬戌吐蕃贊普卒子器弩悉弄立生八年矣時器弩悉弄與其舅麴薩若詣羊同發兵有弟生六年在論欽陵軍中國人畏欽陵之彊欲立之欽陵不可與薩若共立器弩悉弄上聞贊普卒嗣主未定命裴行儉乘間圖之行儉曰欽陵爲政大臣輯睦未可圖也乃止冬十月癸亥吐蕃文成公主

遣其大臣論塞調傍來告喪并請和親上遣郎將宋令文詣吐蕃會贊普之葬

永隆元年秋七月吐蕃寇河源左武衛將軍黑齒常之擊卻之擢常之爲河源軍經略大使常之以河源衝要欲加兵戍之而轉輸險遠乃廣置烽戍七十餘所開屯田五千餘頃歲收五百餘萬石由是戰守有備焉先是劍南募兵於茂州西南築安戎城以斷吐蕃通蠻之路吐蕃以生羌爲鄉導攻陷其城以兵據之由是西洱諸蠻皆降於吐蕃吐蕃盡據羊同党項及諸羌之地東接涼松茂嶺等州南鄰天竺西陷龜

茲疎勒等四鎮北抵突厥地方萬餘里諸胡之盛莫與爲比 冬十月丙午文成公主薨於吐蕃

開耀元年夏五月己丑河源道經略大使黑齒常之將兵擊吐蕃論贊婆於良非川破之收其糧畜而還常之在軍七年吐蕃深畏之不敢犯邊

永淳元年秋七月吐蕃將論欽陵寇柘松翼等州詔左驍衛郎將李孝逸右衛郎將衛蒲山發秦渭等州兵分道禦之 冬十月吐蕃入寇河源軍軍使婁師德將兵擊之於白水澗八戰八捷上以師德爲比部員外郎左驍衛郎將河源軍經略副使曰卿有文武

材勿辭也

則天皇后垂拱元年冬十一月癸卯命天官尚書韋待價爲燕然道行軍大總管以討吐蕃

三年冬十一月太后欲遣韋待價將兵擊吐蕃鳳閣侍郎韋方質奏請如舊制命御史監軍太后曰古者明君遣將閫外之事悉以委之比聞御史監軍軍中事無大小皆須承稟以下制上非令典也且何以責其有功遂罷之

永昌元年夏五月丙辰命文昌右相韋待價爲安息道行軍大總管擊吐蕃 韋待價軍至寅識迦河與

吐蕃戰大敗會大雪糧運不繼待價旣無將領之才
狼狽失據士卒凍餒死亡甚眾乃引軍還太后大怒
丙子待價除名流繡州斬副大總管安西大都護閻
溫古安西副都護唐休璟收其餘眾撫安西土太后
以休璟爲西州都督

天授二年夏五月以岑長倩爲武威道行軍大總管
擊吐蕃中道召還軍竟不出

長壽元年春二月己亥吐蕃党項部落萬餘人內附
分置十州 夏五月吐蕃酋長曷蘇帥部落請內附
以右玉鈴衛將軍張玄遇爲安撫使將精卒二萬迎

之六月軍至大渡水西曷蘇事洩爲國人所擒別部酋長咎捶帥羌蠻八千餘人內附立遇以其部落置萊川州而還初新豐王孝傑從劉審禮擊吐蕃爲副總管與審禮皆沒於吐蕃贊普見孝傑泣曰貌類吾父厚禮之後竟得歸累遷右鷹揚衛將軍孝傑久在吐蕃知其虛實會西州都督唐休璟請復取龜茲于闐疎勒碎葉四鎮敕以孝傑爲武威軍總管與左武衛大將軍阿史那忠節將兵擊吐蕃冬十月丙戌大破吐蕃復取四鎮置安西都護府於龜茲發兵戍之延載元年春二月武威道總管王孝傑破吐蕃勃論

贊刃突厥可汗倭子等於冷泉及大嶺各三萬餘人
碎葉鎮守使韓思忠破泥熟俟斤等萬餘人

天冊萬歲元年秋七月辛酉吐蕃寇臨洮以王孝傑
爲肅邊道行軍大總管以討之

萬歲通天元年正月甲寅以婁師德爲肅邊道行軍
副總管擊吐蕃 春三月壬寅王孝傑婁師德與吐
蕃將論欽陵贊婆戰於素羅汗山唐兵大敗孝傑坐
免爲庶人師德貶原州員外司馬師德因署移牒驚
曰官爵盡無邪旣而曰亦善亦善不復介意 秋九
月吐蕃復遣使請和親太后遣右武衛冑曹參軍貴

鄉郭元振往察其宜吐蕃將論欽陵請罷安西四鎮
戍兵并求分十姓突厥之地元振曰四鎮十姓與吐
蕃種類本殊今請罷唐兵豈非有兼并之志乎欽陵
曰吐蕃苟貪土地欲爲邊患則東侵甘涼豈肯規利
於萬里之外邪乃遣使者隨元振入請之朝廷疑未
決元振上疏以爲欽陵求罷兵割地此乃利害之機
誠不可輕舉措也今若直拒其善意則爲邊患必深
四鎮之利遠甘涼之害近不可不深圖也宜以計緩
之使其和望未絕則善矣彼四鎮十姓吐蕃之所甚
欲也而青海吐谷渾亦國家之要地也今報之宜曰

四鎮十姓之地本無用於中國所以遣兵戍之欲以鎮撫西域分吐蕃之勢使不得併力東侵也今若果無東侵之志當歸我吐谷渾諸部及青海故地則五俟斤部亦當以歸吐蕃如此則足以塞欽陵之口而亦未與之絕也若欽陵小有乖違則曲在彼矣且四鎮十姓款附日久今未察其情之向背事之利害遙割而棄之恐傷諸國之心非所以御四夷也太后從之元振又上言吐蕃百姓疲於徭戍早願和親欽陵利於統兵專制獨不欲歸款若國家歲發和親使而欽陵常不從命則彼國之人怨欽陵日深望國恩日

甚設欲大舉其徒固亦難矣斯亦離間之漸可使其
上下猜阻禍亂內興矣太后深然之元振名震以字
行

聖歷二年 初吐蕃贊普器弩悉弄尚幼論欽陵兄
弟用事皆有勇略諸胡畏之欽陵居中秉政諸弟握
兵分據方面贊婆常居東邊爲中國患者三十餘年
器弩悉弄浸長陰與大臣論巖謀誅之會欽陵出外
贊普詐云出畋集兵執欽陵親黨二千餘人殺之遣
使召欽陵兄弟欽陵等舉兵不受命贊普將兵討之
欽陵兵潰自殺夏四月贊婆帥所部千餘人來降太

后命左武衛鎧曹參軍郭元振與河源軍大使夫蒙
令卿將騎迎之以贊婆爲特進歸德王欽陵子弓仁
以所統吐谷渾七千帳來降拜左玉鈐衛將軍酒泉
郡公 冬十月丁亥論贊婆至都太后寵待賞賜甚
厚以爲右衛大將軍使將其眾守洪源谷

久視元年秋閏七月丁酉吐蕃將麴莽布支寇涼州
圍昌松隴右諸軍大使唐休璟與戰於洪源谷麴莽
布支兵甲鮮華休璟謂諸將曰諸論旣死麴莽布支
新爲將不習軍事諸貴臣子弟皆從之望之雖如精
銳實易與耳請爲諸君破之乃被甲先陷陳六戰皆

捷吐蕃大奔斬首二千五百級獲二裨將而還 庚戌以魏元忠爲隴右諸軍大使擊吐蕃

長安二年秋九月己卯吐蕃遣其臣論彌薩來求和
癸未宴論彌薩於麟德殿時涼州都督唐休璟入
朝亦預宴彌薩屢窺之太后問其故對曰洪源之戰
此將軍猛厲無敵故欲識之太后擢休璟爲右武威
金吾二衛大將軍休璟練習邊事自碣石以西踰四
鎮綿互萬里山川要害皆能記之 冬十月戊申吐
蕃贊普將萬餘人寇茂州都督陳大慈與之四戰皆
破之斬首千餘級

三年夏四月吐蕃遣使獻馬千匹金二千兩以求昏
吐蕃南境諸部皆叛贊普器弩悉弄自將擊之卒
於軍中諸子爭立久之國人立其子棄隸踏贊爲贊
普生七年矣

中宗景龍元年春三月庚子吐蕃遣其大臣悉薰熱
入貢夏四月辛巳以上所養雍王守禮女金城公主
妻吐蕃贊普

三年冬十一月乙亥吐蕃贊普遣其大臣尚贊咄等
千餘人逆金城公主

睿宗景雲元年春正月上命紀處訥送金城公主適

吐蕃處訥辭又命趙彥昭亦辭丁丑命左驍衛大將軍楊矩送之己卯上自送公主至始平二月癸未還宮公主至吐蕃贊普爲之別築城以居之

玄宗開元元年冬十二月甲午吐蕃遣其大臣來求和

二年夏五月己酉吐蕃相全達延遣宰相書請先遣解琬至河源正二國封疆然後結盟琬嘗爲朔方大總管故吐蕃請之前此琬以金紫光祿大夫致仕復召拜左散騎常侍而遣之又命宰相復全達延書招懷之琬上言吐蕃必陰懷叛計請預屯兵十萬於秦

渭等州以備之 六月丙寅吐蕃使其宰相尚欽藏
來獻盟書 秋八月乙亥吐蕃將全達延乞力徐帥
眾十萬寇臨洮軍蘭州至於渭源掠取牧馬命薛訥
白衣攝左羽林將軍爲隴右防禦使以右驍衛將軍
常樂郭知運爲副使與太僕少卿王峻帥兵擊之辛
巳大募勇士詣河隴就訥教習初鄯州都督楊矩以
九曲之地與吐蕃其地肥饒吐蕃就之畜牧因以入
寇矩悔懼自殺 冬十月吐蕃復寇渭源丙辰上下
詔欲親征發兵十餘萬人馬四萬匹 甲子薛訥與
吐蕃戰於武街大破之時太僕少卿隴右羣牧使王

唆帥所部二千人與訥會擊吐蕃。至達延將吐蕃兵十萬屯大來谷。唆選勇士七百衣胡服夜襲之。多置鼓角於其後五里。前軍遇敵大呼。後人鳴鼓角以應之。虜以爲大軍至。驚懼自相殺傷死者萬計。訥時在武街去大來谷二十里。虜軍塞其中間。唆復夜出兵襲之。虜大潰。始得與訥軍合同。追奔至洮水。復戰於長城堡。又敗之。前後殺獲數萬人。豐安軍使王海賓戰死。乙丑。敕罷親征。戊辰。姚崇、盧懷慎等奏頃者吐蕃以河爲境。神龍中尚公主遂踰河築城置獨山九曲。兩軍去積石三百里。又於河上造橋。今吐蕃旣叛。

宜毀橋拔城從之以王海賓之子忠嗣爲朝散大夫
尚輦奉御養之宮中 乙酉命左驍衛郎將尉遲瓌
使於吐蕃宜慰金城公主吐蕃遣其大臣宗俄因矛
至洮水請和用敵國禮上不許自是連歲犯邊
四年春二月吐蕃圍松州 癸酉松州都督孫仁獻
襲擊吐蕃於城下大破之 秋七月吐蕃復請和上
許之

五年秋七月壬寅隴右節度使郭知運大破吐蕃於
九曲

六年冬十一月戊辰吐蕃奉表請和乞舅甥親署誓

文又令彼此宰相皆著名於其上

七年夏六月戊辰吐蕃復遣使請上親署誓文上不許曰昔歲誓約已定苟信不由衷亟誓何益

十年秋八月癸未吐蕃圍小勃律王沒謹忙謹忙求救於北庭節度使張嵩曰勃律唐之西門勃律亡則西域皆爲吐蕃矣嵩乃遣疎勒副使張思禮將蕃漢步騎四千人救之晝夜倍道與謹忙合擊吐蕃大破之斬獲數萬自是累歲吐蕃不敢犯邊

十五年春正月辛丑涼州都督王君奭破吐蕃於青海之西初吐蕃自恃其彊致書用敵國禮辭指悖慢

上意常怒之張說言於上曰吐蕃無禮誠宜誅夷但連兵十餘年甘涼河鄯不勝其弊雖師屢捷所得不償所亡聞其悔過求和願聽其款服以紓邊人上曰俟吾與王君奐議之說退謂源乾曜曰君奐勇而無謀常思僥倖若二國和親何以爲功吾言必不用矣及君奐入朝果請深入討之去冬吐蕃大將悉諾邏寇大斗谷進攻甘州焚掠而去君奐度其兵疲勒兵躡其後會大雪虜凍死者甚眾自積石軍西歸君奐先遣人間道入虜境燒道旁草悉諾邏至大非川欲休士馬而野草皆盡馬死過半君奐與秦州都督張

景順追之及於青海之西乘冰而度悉諾邏已去破其後軍獲其輜重羊馬萬計而還君奭以功遷左羽林大將軍拜其父壽爲少府監致仕上由是益事邊功秋九月丙子吐蕃大將悉諾邏恭祿及燭龍莽布支攻陷瓜州執刺史田元獻及河西節度使王君奭之父進攻玉門軍縱所虜俘使歸涼州謂君奭曰將軍常以忠勇許國何不一戰君奭登城西望而泣竟不敢出兵莽布支別攻常樂縣縣令賈師順帥眾拒守及瓜州陷悉諾邏悉兵會攻之旬餘日吐蕃力盡不能克使人說降之不從吐蕃曰明府旣不降宜

斂城中財贈吾當退師順請脫士卒衣悉諾邏知無財乃引去毀瓜州城師順遽開門收器械修守備虜果復遣精騎還視城中知有備乃去師順岐州人也閏月庚子吐蕃贊普與突騎施蘇祿圍安西城安西副大都護趙頤貞擊破之王君奭帥精騎邀吐蕃使者於肅州還至甘州南鞏筆驛回紇司馬護輸伏兵突起殺君奭辛巳以左金吾衛大將軍信安王禕爲朔方節度等副大使禕恪之孫也以朔方節度使蕭嵩爲河西節度等副大使時王君奭新敗河隴震駭嵩引刑部員外郎裴寬爲判官與君奭判官牛

僊客俱掌軍政人心浸安寬灌之從弟也僊客本鶻
觚小吏以才幹軍功累遷至河西節度判官爲君奭
腹心嵩又奏以建康軍使河北張守珪爲瓜州刺史
帥餘眾築故城板榦裁立吐蕃猝至城中相顧失色
莫有鬪志守珪曰彼眾我寡又瘡痍之餘不可以矢
刃相持當以奇計取勝乃於城上置酒作樂虜疑其
有備不敢攻而退守珪縱兵擊之虜敗走守珪乃修
復城市收合流散皆復舊業朝廷嘉其功以瓜州爲
都督府以守珪爲都督悉諾邏威名甚盛蕭嵩縱反
間於吐蕃云與中國通謀贊普召而誅之吐蕃由是

少衰 冬十二月戊寅制以吐蕃爲邊患令隴右道及諸軍團兵五萬六千人河西道及諸軍團兵四萬人又徵關中兵萬人集臨洮朔方兵二萬人集會州防秋至冬初無寇而罷伺虜入寇互出兵腹背擊之十六年秋七月吐蕃大將悉末朗寇瓜州都督張守珪擊走之乙巳河西節度使蕭嵩隴右節度使裴忠亮大破吐蕃於渴波谷忠亮追之拔其大莫門城擒獲甚眾焚其駱駝橋而還 八月辛卯左金吾將軍杜賓客破吐蕃於祁連城下時吐蕃復入寇蕭嵩遣賓客將彊弩四千擊之戰自辰至暮吐蕃大潰獲其

通鑑綱目卷一百一十五
大將一人虜散走投山哭聲四合

十七年春三月瓜州都督張守珪沙州刺史賈師順
擊吐蕃大同軍大破之 甲寅朔方節度使信安王
禕攻吐蕃石堡城拔之初吐蕃陷石堡城畱兵據之
侵擾河右上命禕與河西隴右同議攻取諸將咸以
爲石堡據險而道遠攻之不克將無以自還且宜按
兵觀釁禕不聽引兵深入急攻拔之仍分兵據守要
害令虜不得前自是河隴諸軍遊弈拓境千餘里上
聞大悅更命石堡城曰振武軍

十八年夏五月吐蕃遣使致書於境上求和 秋九

月吐蕃兵數敗而懼乃求和親忠王友皇甫惟明因奏事從容言和親之利上曰贊普嘗遺吾書悖慢此何可捨對曰贊普當開元之初年尚幼穉安能爲此書殆邊將詐爲之欲以激怒陛下耳夫邊境有事則將吏得以因緣盜匿官物妄述功狀以取勳爵此皆奸臣之利非國家之福也兵連不解日費千金河西隴右因茲困敝陛下誠命一使往視公主因與贊普面相約結使之稽顙稱臣永息邊患豈非御夷狄之長策乎上悅命惟明與內侍張元方使於吐蕃贊普大喜悉出貞觀以來所得敕書以示惟明冬十月遣

其大臣論名悉獵隨惟明入貢表稱甥世尚公主義
同一家中間張玄表等先興兵寇掠遂使二境交惡
甥深識尊卑安敢失禮正爲邊將交構致獲罪於舅
屢遣使者入朝皆爲邊將所遏今蒙遠降使臣來視
公主甥不勝喜荷儻使復修舊好死無所恨自是吐
蕃復款附

十九年春正月辛未遣鴻臚卿崔琳使於吐蕃琳神
慶之子也吐蕃使者稱公主求毛詩春秋禮記正字
于休烈上疏以爲東平王漢之懿親求史記諸子漢
猶不與況吐蕃國之寇讎今資之以書使知用兵權

略愈生變詐非中國之利也事下中書門下議之裴
光庭等奏吐蕃聾昧頑嚚久叛新服因其有請賜以
詩書庶使之漸陶聲教化流無外休烈徒知書有權
略變詐之語不知忠信禮義皆從書出也上曰善遂
與之休烈志寧之玄孫也 秋九月辛未吐蕃遣其
相論尚它碑入見請於赤嶺爲互市許之
二十一年春二月丁酉金城公主請立碑於赤嶺以
分唐與吐蕃之境許之

張溥曰唐太宗貞觀八年吐蕃贊普棄宗弄讚
遣使入貢此吐蕃通中國之始也十二年吐蕃

寇松州侯君集擊敗之此吐蕃寇中國之始也
十五年以文成公主嫁吐蕃則中國與吐蕃婚
矣高宗龍朔三年吐蕃擊破吐谷渾詔鄭仁泰
等分屯涼鄯備之咸亨元年薛仁貴郭待封擊
吐蕃敗績與論欽陵約和而還則吐蕃漸大與
中國抗矣三年吐蕃遣仲宗入貢儀鳳三年李
敬立與吐蕃將論欽陵戰敗績永隆元年吐蕃
寇河源黑齒常之擊卻之永淳元年婁師德擊
吐蕃於白水澗八戰八捷則吐蕃忽貢忽叛中
國勞於用兵矣武后垂拱四年詔發兵擊生羌


及吐蕃不果行永昌元年遣韋待價擊吐蕃大
敗除名流繡州長壽元年敕王孝傑等擊吐蕃
復取龜茲于闐疎勒碎葉四鎮萬歲通天元年
遣婁師德等擊吐蕃大敗秋吐蕃遣使請和親
郭元振請許之久視元年吐蕃將麴莽布支寇
涼州唐休璟破之長安二年吐蕃遣使求和冬
吐蕃寇茂州陳大慈破之中宗景龍元年吐蕃
遣使入貢自此迄於睿宗中國累歲無吐蕃患
矣玄宗開元二年吐蕃復寇渭源薛訥王唆敗
之六年吐蕃請和十年張嵩擊破吐蕃十五年

吐蕃寇甘州王君奭追擊至青海西破之秋吐蕃陷瓜州十七年信安王禕攻吐蕃拔石堡城十八年吐蕃遣使入貢十九年以詩書賜吐蕃二十五年吐蕃西擊勃律趙惠琮矯詔令崔希逸擊破之二十八年吐蕃寇安戎城發關中兵救之二十九年吐蕃四十萬入寇臧希液帥眾五千擊破之冬吐蕃陷石堡城天寶六載董延光攻吐蕃石堡城不克反譖貶王忠嗣七載哥舒翰築神威軍應龍城吐蕃不敢近青海八載翰拔吐蕃石堡城大抵玄宗之世吐蕃每入輒

創卽爲寇而希矣及肅宗卽位戎患寢昌代德
繼緒大寇遂見遂至京輔罹毒天子出走強同
回紇而罪深僕固大唐封疆蹙牙犁庭之盛淪
胥忽諸抑何前後勢異哉幽陵盜起乘輿播遷
戎介西極密邇王畿隴右諸鎮安史所不爭得
規便而奄有猶之秦亂而匈奴大隋亂而突厥
雄時地然也然吐蕃本發羌支屬禿髮衰種俗
事獯羶世隔華風弗夜氏驅野馬刺犁牛跳躍
西域卽思通朝尚主一不得遂擊吐谷渾攻党
項白蘭上脅中朝太宗不卽乘銳戡定反下降


公主生其侈心築城夸耀歲瞰邊庭中宗時棄
隸踏贊請婚又以金城公主妻之楊矩得厚賂
請河西九曲爲公主湯沐虜近與唐接勢益張
易入寇和親之失策也辱國喪地於吐蕃尤甚
太宗寧能辭責哉

通鑑紀事本末卷一百七十五



公主生其侈心築城夸耀故職遷廷中坐時
隸賂贊請婚又以金城公主妻之尚年得厚脩
請河西九曲爲公主湯沐房近與唐接對家張
易入寇和親之失策也辱國喪地於吐蕃尤甚
太宗雖能審有哉

通鑑記事本末卷一百七十五



EAST ASIAN LIBRARY
UNIVERSITY OF TORONTO LIBRARY
130 St. George Street
8th FLOOR
TORONTO, CANADA M5S 1A5